

Aatsitassanut ikummatissanullu inatsisip allanngortilersaarneqarneranut atatillugu ullumikkut avatangiisit illersornissaannik Inatsisartut inatsisaanni kapitali 14-imiittumisut immikkut maalaarfiusinnaasumut malittarisassanik Naalakkersuisut siunnersuuteqaqqullugit Inatsisartut aalajangiiffigisassaattut siunnersuut.
(Inatsisartunut ilaasortaq Naaja Nathanielsen, Inuit Ataqatigiit)

Akissuteqaat

(Inuussutissarsiornermut Aatsitassanullu Naalakkersuisoq)
Siullermeerneqarnera

Aatsitassanut Ikummatissanullu Pisortaqaarfik oqartussaasutut Namminersorlutik Oqartussani naalakkersuisoqarfittuulli inatsisitigut inissisimavoq, Naalakkersuisup suliassaqaarfimmut akisussaasuusup ataani toqqaannartumik inissisimasuulluni, peqatigisaanillu naalakkersuisoqarfik assigalugu allaffissornikkut oqartussaasuni qullersaalluni.

Taamaattumik Aatsitassanut Ikummatissanullu Pisortaqaarfik naalakkersuisoqarfimmut sanilliunneqarsinnaavoq, taamaalilluni aalajangiineq Aatsitassanut Ikummatissanullu Pisortaqaarfimmi aalajangiunneqarsimasoq, Naalakkersuisut aalajangeneralugu.

Pingaarnertut maleruagassaasarpog Naalakkersuisuni aalajangiinerit naammagittaalliuuteqartarfimmut immikkut pilersinneqarsimasumut, pisussaaffiliisumik Naalakkersuisut aalajangernerinik allanngortitsisinnaasumut ingerlateqqinneqarsinnaanngitsut.

Tamanna aamma aalisarnermut inatsit malillugu atuuppoq, tassani Naalakkersuisut tassaallutik oqartussaasut ukiut tamaasa Kalaallit Nunaata aalisarnermut oqartussaaffiani aalisakkanut aalajangersimasunut TAC-inik aalajangersaasartuusut aammalu pisassiissutini TAC-inik agguasartuusut.

Siunnersuutinni Avatangiisit Innarlitsaaliorneqarnissaat pillugu Naammagittaalliuuteqartarfik, Avatangiisit innarlitsaaliorneqarnissaannik Inatsisartut inatsisaat nr. 9, 22. november 2011-imeersumi kapitali 14 malillugu pilersinneqarsimasoq innersuussutigaat.

Avatangiisinut inatsit malillugu kommunalbestyrelsi najukkami avatangiisinut oqartussaasutut, avatangiisinut suliassaqaarfimmi aalajangiinerit amerlanersaanni aalajangiisuusarpoq. Pissutsit taakkua, tassalu najukkami avatangiisinut oqartussaanerup kommunalbestyrelsimut inissinneqarsimanera, nalinginnaasumik avatangiisinut suliassaqaarfimmi immikkut naammagittaalliuuteqartarfimmik pilersitsisoqarsimaneranut tunngaviuvoq. Taamaalilluni kommunip suliassaqaarfiisa iluanni allaffissornikkut aalajangiinerit immikkut naammagittaalliuuteqartarfimmut tunngatillugu maleruagassanik inatsimmi aalajangersaasoqartarnera nalinginnaasuuvoq.

Nunatsinni pinngortitami pisuussutit, uumassusillit soorlu aalisakkatut raajatullu ittut aammalu uumassuseqanngitsut aatsitassatut ittut ingerlatsivigineqarnissaat nunamut pingaaruteqarluinnartuuvoq. Aalisarnermut inatsit malillugu pisassiisarnermut aalajangiinerit pingaarutillit aammalu aatsitassanut ikummatissanullu inatsit malillugu akuersissutit taamaallaat Naalakkersuisunit akuersissuteqarfigineqarsinnaapput. Aalajangiinissamut tunngavissat sapinngisamik pitsaanerpaanissaat qulakkeerniarlugu, aalajangiinerit taakkua

ilisimatusarnermik aallaaveqartumik arlaannaannulluunniit attuumassuteqanngitsumik siunnersuineq tunngavigalugu pisarput. Pinngortitaleriffik pisuussutitut uumassusilinnut tunngatillugu suliassaqaarfimmi tassani Naalakkersuisunut siunnersuisartuuvoq, DCE-li Pinngortitaleriffik suleqatigalugu aatsitassanut suliassaqaarfimmi avatangiisinut apeqqutini siunnersuisartuulluni.

Aalisarnermut aamma aatsitassanut suliassaqaarfik aammalu suliassat angisoorsuit nunatta ineriartorneranut pingaaruteqartorujussuusut Naalakkersuisut isumaqarput. Taamaattumik suliassaqaarfinni taakkunani aalajangiinerit naalakkersuinikkut akisussaasunit aalajangiiffigineqartarnissaat Naalakkersuisut aalajangiisuulluinnartutut isigaat. Taamaattumik aalajangiinerit taamaattut naammagittaalliuuteqartarfinni toqqaannartumik oqartussaaqatigiinnermi nakkutigineqanngitsumi inaarutaasumik aalajangiiffigitinneqartarnissaat tamatumunnga naapertuutinngitsoq Naalakkersuisut isumaqarput.

Naalakkersuisuni aalajangiinerit, Tunngaviusumik inatsimmi § 63 malillugu eqqartuussivimmut tamatigut suliakkiunneqarsinnaapput, taamaaliornikkut Naalakkersuisut aalajangiisinnaatitaanerannut tunngatillugu inatsisitigut innarlitsaaliuineq nakkutigineqarluni.

Aatsitassanut ikummatissanullu inatsit malillugu Naalakkersuisut aalajangiineranni, inuiaqatigiit aatsitassanut nunallu iluanut tunngatillugu ingerlatani aningaasaqarnikkut inuussutissarsiornikkullu soqutigisaat, isumannaallisaanermut, peqqinnissamut, avatangiisinut, isumalluutinik atuinnermut aamma inuiaqatigiinni piujuartussamik iluaqutaasumik sunniuteqartitsinnermi eqqarsaatigisassanut ataqatigiissillugu isumagineqartussaapput. Naammagittaalliuuteqartarfinni, Avatangiisinut Naammagittaalliuuteqartarfittut ittumi, sulianut immikkut piginnaaneqarnissamik piunasaqaatitaqanngitsumik pingasunik ilaasortaqaartumi, aatsitassanut ikummatissanullu inatsit malillugu isumannaatsumik aalajangiinerit pisarnissaannik piunasaqaataasutut, piginnaaneqarnerit tamaasa kattutsinnissaat ajornakusoortorujussuusussaavoq.

Aatsitassanut ikummatissanullu inatsisip iluarsaanneqarnissaani pisussami Naalakkersuisut Inatsisartut inatsisissaattut siunnersuummik saqqummiussissamaarput, tassani avatangiisinut oqartussaasut suliarinnittarnerat arlaannaannulluunniit attuumassuteqanngitsumik ilisimatusarnermik aallaaveqartumik, aatsitassanut suliassaqaarfimmi avatangiisinut apeqqutini Naalakkersuisunut inassuteqaateqartartussamik inatsisitigut aalajangersaasoqassalluni. Taamaalilluni pisortatigoortumik aatsitassanut aamma avatangiisinut tunngatillugu suliarinninneq sullissivinni assigiinngitsuni isumagineqassasoq inatsisitigut aalajangersarneqassaaq. Taamatuttaaq Naalakkersuisut suliassanut angisoorsuarput aatsitassanut ikummatissanullu inatsimmi pineqartunut ilaasuunngitsunut atatillugu avatangiisinut apeqqutini arlaannaannulluunniit attuumassuteqanngitsumik ilisimatusarnermik aallaaveqartumik siunnersuisarnissaq sulissutiginiarpaat.

Tamanna tunngavigalugu naammagittaalliuuteqartarfik immikkut ittoq pillugu maleruagassanik atuutsitsilernissamut siunnersuummik Naalakkersuisut saqqummiussiniangillat.

Taamaattumik Naalakkersuisut inassutigissavaat aalajangiiffigisassatut siunnersuut akuerineqassanngitsoq.